

Fundacion Casa Cuna Progreso ta den cora cu banco y gobierno no ta paga

ORANJESTAD – Ainda gobierno no a cumpli cu e debe cu nan tin cu Fundacion Casa Cuna Progreso for di 9 aña pasa.

Presidente di e hunta directiva di Fundacion Casa Cuna Progreso, Henry Coffi, a declara na Bon Dia Aruba cu dos siman pasa nan a manda otro carta pa gobierno den e caso aki pa minister Paul Croes pa sostene un reunion y asina busca un solucion beneficioso pa ambos partido. Sin embargo te ainda nan no a ricibi ni un contesta riba nan solicitud. Den e carta nan ta pidi gobierno pa sinta na mesa atrobe y trata pa solucion a problema.

Debe no ta sostenibel
Tur cos a keda status quo ya cu e fundacion aki ta papianando cu gobierno desde varios aña caba y ainda nan no a haya e placa cu gobierno mester a paga e fundacion aki pa concepto di mantencion di e muchanan interna na Casa Cuna. Nan ta evaluando den nan seno ki medida lo bay tuma pa busca un solucion na e falta di cumplimento di gobierno. El a aclaria na Bon Dia Aruba cu un medida lo ta, cana e caminda legal entablado un caso contra gobierno pa asina nan por cumpli cu e compromiso adkiri aki. "Gobierno ta debe nos placa y nan no ta responde nos pedido pa sinta na mesa y bin cu un solucion, esaki ta loke nos kier", el a bisa.

Sr. Coffi a bisa cu e placa cu gobierno ta debe Fundacion Casa Cuna Progreso no ta cuestion di subsidio. El a splica cu nan tin un contract cu gobierno, caminda nan ta wak pa e muchanan y gobierno mester paga pa cada mucha 10 florin pa dia di alimentacion y mantencion. Esaki ta e suma cu nan no ta ricibiendo desde 2005 y e suma aki ta yegando casi 1 miyon florin.

E situacion aki no ta sostenibel. Aunke Fundacion Casa Cuna Progreso ta atendiendo cu e muchanan ya cu nan ta

ricibiendo cierto donacion. Tambe nan tabatin placa den banco y banco ta fia nan placa pa por cumpli cu nan obligacionnan. "Pero nos ta den cora!", el a bisa.

E ta bisa cu lo unico cu gobierno ta cumpliendo ta e salario di e empleadonan di e fundacion, pero e no ta pagando pa mantencion di e luga, tampoco servicio, mientras gobierno no ta pagando e suma di 10 florin pa dia pa mucha. Sr. Coffi ta haya e suma aki masha minimo pasobra si bo tin yiu y bo ta trata di mantene pa 10 florin pa dia bo sa cu esaki ta un hazaña.

Encuanto e cantidad di mucha na Casa Cuna, e ta varia ya cu e fundacion aki por atende te hasta 36 mucha y actualmente nan tin alrededor di 20 mucha.

Solucion

Sr. Coffi a bisa cu nan ta kies semper pa un posicion di dialogo, di 'bay sinta cu gobierno y bin cu un bon solucion'. Nan ta prefera pa concilia pero si gobierno no kier, nan lo evalua kico ta nan posicion legal pa tuma un decision.

"Nos kier keda bon cu gobierno y bisa nan: ey bin traha cu nos pa nos soluciona e echo", el a declara na Bon Dia Aruba. No ta cuestion, segun

sr. Coffi, cu nan ta forsa gobierno pa bin paga e debe aki mañan pero gobierno mester compromete pa paga e debe. "Si bo tin e debe bin sinta cu nos pa wak kico nos ta haci cu e debe", sr. Coffi a agrega. Igualmente el a laga sa cu nan no kier hinca e problema aki den un contexto politico, pero si busca un bon solucion pe.

Finalmente el a bisa cu absolutamente Fundacion Casa Cuna Progreso no kier pleita cu gobierno. Loke nan mester ta un suma pa por kita e debe cu nan tin na banco ya cu nan ta traha a base di un credito na banco, y actualmente nan ta den cora. Si nan por haya e suma aki Fundacion Casa Cuna Progreso por paga sin mester di paga interes na banco. "E unico manera cu nos ta sobrevivir ta cu banco ta fia nos poco placa", sr. Coffi a declara.

Sr. Coffi no a bisa te na unda Fundacion Casa Cuna Progreso por wanta cu e situacion di no ta sostenibel aki, ya cu afortunadamente e fundacion aki ta conta cu bon hendenan cu ta yuda nan hopi, entre nan boluntarionan, ya cu henter nan directiva ta hende boluntario y nan ta hende capacita y generoso. "P'esey nos ta papianando den ki forma nos por sigui", el a indica. □